

461

Na osnovu člana 17. stav 2. i člana 72. Zakona o hrani ("Službeni glasnik BiH", broj 50/04) i člana 17. Zakona o Vijeću ministara BiH ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine, na prijedlog Agencije za sigurnost hrane Bosne i Hercegovine u saradnji s nadležnim organima entiteta i Brčko Distrikta Bosne i Hercegovine, na 127. sjednici održanoj 6. jula 2010. godine, donijelo je

PRAVILNIK**O TJESTENINAMA, TIJESTU I PROIZVODIMA OD TIJESTA****DIO PRVI - OPĆE ODREDBE****Član 1.**
(Predmet)

Pravilnikom o tjesteninama, tijestu i proizvodima od tijesta (u daljnjem tekstu: Pravilnik) propisuju se: minimalan kvalitet, kategorizacija i označavanje tjestenina, tijesta i proizvoda od tijesta (u daljnjem tekstu: proizvodi) koji se stavljaju na tržište Bosne i Hercegovine.

Član 2.
(Deklariranje ili označavanje)

Deklariranje ili označavanje zapakiranih proizvoda namijenjenih krajnjem potrošaču propisano je Pravilnikom o općem deklariranju ili označavanju zapakirane hrane ("Službeni glasnik BiH", broj 87/08) te odredbama ovog Pravilnika.

Član 3.
(Aditivi)

Proizvodima se tokom proizvodnje mogu dodavati aditivi u skladu s Pravilnikom o uslovima za upotrebu prehrambenih aditiva u hrani namijenjenoj ishrani ljudi ("Službeni glasnik BiH", broj 83/08) i Pravilnikom o upotrebi prehrambenih aditiva, osim boja i zaslađivača u hrani ("Službeni glasnik BiH", broj 83/08).

Član 4.
(Mjeriteljski zahtjevi)

Netokoličina, dozvoljeno negativno odstupanje, te način označavanja netokoličine za zapakirane proizvode mora biti u skladu s propisom koji važi za zapakirane proizvode.

Član 5.
(Proizvođačka specifikacija)

- (1) Za proizvode definirane ovim Pravilnikom proizvođač je dužan imati proizvođačku specifikaciju prije početka proizvodnje.
- (2) Proizvođačka specifikacija sadrži:
 - a) evidencijski broj specifikacije;
 - b) naziv proizvoda i njegovo trgovačko ime ako ga proizvod ima;
 - c) datum donošenja proizvođačke specifikacije;
 - d) datum početka proizvodnje po predmetnoj proizvođačkoj specifikaciji;
 - e) seriju ili lot;
 - f) deklaraciju i podatke o hranjivoj vrijednosti;
 - g) kratak opis tehnološkog postupka proizvodnje;
 - h) organoleptička svojstva proizvoda;
 - i) izvještaj o analizi odgovarajućih parametara specifičnih za proizvod izvršenoj u ovlaštenom laboratoriju;
 - j) grupu kojoj proizvod pripada.

DIO DRUGI - POSEBNE ODREDBE**Član 5.**
(Podjela proizvoda od žitarica)

Proizvodi definirani ovim Pravilnikom s obzirom na namjenu, sastav, osobine i vrste tehnološkog procesa razvrstavaju se i stavljaju na tržište pod nazivom:

- a) tjestenine;
- b) tijesta i proizvodi od tijesta.

POGLAVLJE I. TJESTENINE**Član 6.**
(Definicija)

- (1) Tjestenine su proizvodi dobiveni miješanjem i oblikovanjem pšenične krupice ili namjenskog brašna s vodom, a mogu se dodavati i drugi sastojci i aditivi u skladu s članom 3. ovog Pravilnika.
- (2) Pri proizvodnji tjestenina može se koristiti i lomljena tjestenina.

Član 7.
(Razvrstavanje i imenovanje tjestenine)

- (1) Prema tehnološkom postupku, tjestenine se razvrstavaju i stavljaju na tržište pod nazivom:
 - a) svježa tjestenina;
 - b) sušena tjestenina;
 - c) pretkuhana tjestenina;
 - d) brzo zamrznuta tjestenina.
- (2) Prema sastojcima, tjestenine se razvrstavaju i stavljaju na tržište pod nazivom:
 - a) obična tjestenina;
 - b) tjestenina s jajima;
 - c) tjestenina s dodacima;
 - d) punjena tjestenina.
- (3) Obična tjestenina proizvodi se od mlinskih proizvoda i vode i označava se samo kao tjestenina.
- (4) Tjestenina s jajima proizvodi se od mlinskih proizvoda, vode i jaja, a mora sadržavati najmanje tri jajeta, razreda S, mala jaja u skladu s posebnim propisom o kvalitetu jaja ili najmanje 124 g jajnog melanža sa 75% vode ili 31 g suhe tvari jaja u prahu na 1 kg mlinskog proizvoda obračunato na 14% vlage.
- (5) Tjestenina s dodacima proizvodi se od mlinskih proizvoda, vode i dodatnih sastojaka (proizvodi od voća, povrća, jaja i dr.). Tjestenina s dodacima mora biti označena tako da je uočljiv dodati sastojak (npr. tjestenina s povrćem, tjestenina s jajima).
- (6) Punjena tjestenina proizvodi se od mlinskih proizvoda, vode i drugih sastojaka te puni različitim nadjevima ili punilima.

Član 8.
(Minimalni zahtjevi kvaliteta)

Tjestenina mora zadovoljavati sljedeće zahtjeve kvaliteta:

- a) svježa, pretkuhana i brzo smrznuta tjestenina izgledom, okusom, bojom i konzistencijom mora odgovarati pojedinoj vrsti tjesteničarskog proizvoda. Količina vlage može biti do 30%;
- b) sušena tjestenina izgledom, okusom, bojom i konzistencijom mora odgovarati pojedinoj vrsti tjesteničarskog proizvoda. Količina vlage može biti do 13,5%;
- c) stepen kiselosti sušene tjestenine proizvedene bez dodatka proizvoda od voća ili povrća i glutena može biti do 3,5;
- d) da nije obojena vještačkim bojama.

Član 9.
(Stavljanje na tržište)

Tjestenina se na tržište smije stavljati samo zapakirana.

POGLAVLJE II. TIJESTA I PROIZVODI OD TIJESTA**Član 10.**
(Definicija)

Tijesto i proizvodi od tijesta su proizvodi dobiveni odgovarajućim tehnološkim postupcima iz brašna i drugih sastojaka biljnog i životinjskog porijekla, koji odgovaraju propisanim minimalnim uslovima kvaliteta, vode ili druge dozvoljene tekućine i dozvoljenih aditiva.

Član 11.
(Razvrstavanje tijesta)

- (1) Prema načinu obrade, tijesto se razvrstava i stavlja na tržište pod nazivom:
 - a) svježe tijesto;
 - b) brzo zamrznuto tijesto;
 - c) sušeno tijesto;

- d) pečeno tijesto.
- (2) Prema sastavu, tijesto se razvrstava i stavlja na tržište pod nazivom:
- biskvitno tijesto;
 - lisnato tijesto;
 - dizano lisnato tijesto;
 - dizano tijesto;
 - prhko tijesto;
 - vučeno tijesto (jufke);
 - krompirovo tijesto;
 - ostale vrste tijesta.

Član 12.

(Minimalni zahtjevi kvaliteta)

- Biskvitno tijesto je proizvod od brašna, jaja, šećera, smjesa za pekarske i druge proizvode, vode ili druge dozvoljene tekućine te drugih sastojaka.
- Lisnato tijesto je proizvod od brašna, vode ili druge dozvoljene tekućine, masnoća i drugih sastojaka, bez dodatih sredstava za dizanje. Lisnato tijesto mora sadržavati više od 20% masnoće biljnog ili životinjskog porijekla na količinu upotrijebljenog brašna.
- Dizano lisnato tijesto je proizvod od brašna, vode ili druge dozvoljene tekućine, masnoća i kvasca. Dizano lisnato tijesto mora sadržavati više od 15% masnoća biljnog ili životinjskog porijekla na količinu upotrijebljenog brašna.
- Dizano tijesto je proizvod od brašna, vode ili druge dozvoljene tekućine, kvasca i drugih sastojaka.
- Prhko tijesto je proizvod od brašna, vode ili druge dozvoljene tekućine, masnoća, šećera i drugih sastojaka.
- Vučeno tijesto je proizvod od brašna, vode ili druge dozvoljene tekućine i dodatih sastojaka, bez dodatih sredstava za dizanje, izvučeno u tanke slojeve.
- Krompirovo tijesto je proizvod od brašna žitarica, krompira ili krompirovog brašna, krompirovih pahuljica, vode ili druge dozvoljene tekućine i drugih sastojaka.
- Ostale vrste tijesta su proizvodi od mlinskih ili drugih proizvoda od žitarica, soje i drugih sastojaka, vode ili druge dozvoljene tekućine.
- Naziv tijesta određuje se prema sastojku koji prevladava u tijestu.
- Organoleptička i druga svojstva tijesta (izgled, okus, boja, miris, struktura i elastičnost) moraju odgovarati pojedinoj vrsti tijesta.

Član 13.

(Razvrstavanje proizvoda od tijesta)

- Po načinu obrade, proizvodi od tijesta razvrstavaju se i stavljaju na tržište pod nazivom:
 - brzo zamrznuti proizvodi od tijesta;
 - svježi proizvodi od tijesta;
 - proizvodi od tijesta koje je potrebno termički obraditi prema uputstvima proizvođača.
- Razvrstavanje i nazivi proizvoda od tijesta zavise od sastojaka i tehnološkog postupka proizvodnje i moraju u potpunosti odgovarati odredbama člana 12. ovog Pravilnika.
- Proizvodi od tijesta mogu se puniti nadjevom voćnog, mesnog, mliječnog i drugog porijekla, a nazivaju se prema nadjevu.
- Količina nadjeva za proizvode na bazi lisnatog tijesta, dizanog tijesta, dizanog lisnatog tijesta i tijesta od krompira mora iznositi:
 - za proizvode s nadjevom od mesa najmanje 20% mesa ili proizvoda od mesa u odnosu na količinu brašna s 15% vode;
 - za proizvode s nadjevom od sira najmanje 20% sira u odnosu na količinu brašna s 15% vode.
- Proizvodi od tijesta mogu se prelijevati, posipati i ukrašavati sastojcima koji daju osobit izgled ili okus proizvodu.

DIO TREĆI - UTVRĐIVANJE USKLAĐENOSTI

Član 14.

(Ispitivanje)

- Za provjeravanje usklađenosti kvaliteta tjestenine, tijesta i proizvoda od tijesta sa zahtjevima iz ovog Pravilnika koriste

se metode iz propisa koji uređuju uzimanje uzoraka, fizikalne i hemijske analize za kontrolu kvaliteta žitarica, mlinskih i pekarskih proizvoda, tjestenina, tijesta i proizvoda od tijesta.

- U proizvodnji se mogu koristiti i druge priznate i validirane metode ispitivanja kvaliteta ali će u spornim slučajevima nalazi po metodama iz stava (1) ovog člana biti odlučujući.

DIO ČETVRTI - PRIJELAZNE I ZAVRŠNE ODREDBE

Član 15.

(Stavljanje na tržište)

Proizvodi od tjestenine, tijesta i proizvoda od tijesta koji su zapakirani mogu se stavljati na tržište u ambalaži deklariranoj u skladu s odredbama Pravilnika o kvalitetu žita, mlinskih i pekarskih proizvoda, tjestenina i brzo smrznutih tijesta ("Službeni list SFRJ", br. 53/83 i 57/88) do iskorištavanja zaliha te ambalaže a najkasnije 12 mjeseci nakon objavljivanja ovog Pravilnika u "Službenom glasniku BiH".

Član 16.

(Prestanak važenja odredbi)

Danom stupanja na snagu ovog Pravilnika prestaju važiti odredbe iz poglavlja VI. i VII. Pravilnika o kvalitetu žita, mlinskih i pekarskih proizvoda, tjestenina i brzo smrznutih tijesta ("Službeni list SFRJ", br. 53/83 i 57/88).

Član 17.

(Stupanje na snagu)

Ovaj Pravilnik stupa na snagu osmog dana od dana njegovog objavljivanja u "Službenom glasniku BiH".

VM broj 226/10
6. jula 2010. godine
Sarajevo

Predsjedavajući
Vijeća ministara BiH
Dr. Nikola Špirić, s. r.